

Na osnovu člana 8. i 23. Zakona o ministarstvima i drugim organima uprave Tuzlanskog kantona („Službene novine TK“, broj: 17/00, 3/01, 12/03, 10/05, 3/08, 8/11 i 15/13) i člana 6. stav (1) Odluke o utvrđivanju uslova, kriterija i postupka za raspodjelu sredstava sa potrošačke jedinice 24010003 – Tjelesna kultura i sport (broj: 02/1-40-10442 od 27.04. 2017. godine), Ministarstvo obrazovanja, nauke, kulture i sporta Tuzlanskog kantona, raspisuje

**JAVNI POZIV**  
**za sufinansiranje programa/projekata sportskih organizacija i ostvarivanje javnog interesa Tuzlanskog kantona u oblasti sporta i tjelesne kulture**  
**za 2017. godinu**

**1. – Predmet Javnog poziva**

Predmet Javnog poziva je sufinansiranje programa/projekata nosilaca sportskih aktivnosti i ostvarivanje javnog interesa Tuzlanskog kantona u oblasti sporta i tjelesne kulture za 2017. godinu (u daljem tekstu: Javni poziv).

**2. – Način raspodjele sredstava**

2.1. Raspodjela sredstava u iznosu od **362.808,00 KM** vrši se u skladu sa raspoloživim sredstvima Budžeta Tuzlanskog kantona, odnosno u skladu sa odredbama Zakona o izvršenju Budžeta Tuzlanskog kantona za 2017. godinu i Odluke o utvrđivanju uslova, kriterija i postupka za raspodjelu sredstava sa potrošačke jedinice 24010003 – Tjelesna kultura i sport za 2017. godinu (broj: 02/1-40-10442 od 27.04. 2017. godine).

2.2. Raspodjela sredstava vrši se u skladu sa tačkom 5. Javnog poziva, te po osnovu uputstva koje donosi ministar obrazovanja, nauke, kulture i sporta Tuzlanskog kantona (u daljem tekstu: ministar).

**3. – Pravo na dodjelu sredstava**

3.1. Pravo na dodjelu sredstava imaju nosioci sportskih aktivnosti čiji se programi/projekti odnose na:

- a) vrhunski sport,
- b) kvalitetni sport,
- c) sport za lica sa invaliditetom,
- d) tjelesne aktivnosti i sportske igre koje okupljaju veliki broj djece i omladine s ciljem pravilnog razvoja i unapređivanja zdravlja,
- e) finansiranje nabavke neophodnih sportskih rekvizita, sportske opreme za razvoj školskog sporta i pripremu školskih ekipa za nastup na sportskim takmičenjima školske i studentske omladine Tuzlanskog kantona,
- f) sportski odgoj i obrazovanje,
- g) zdravstvenu zaštitu sportista,
- h) pružanje usluga korištenja objekata na ime trenažnog procesa u oblasti sporta,
- i) organizaciju sportskih manifestacija.

3.2. Pod nosiocima sportskih aktivnosti u smislu Javnog poziva smatraju se:

- a) sportski klubovi,
- b) sportska društva,
- c) kantonalni i općinski/gradski sportski savezi,
- d) institucije u oblasti sportskog odgoja i obrazovanja,
- e) institucije u oblasti zdravstvene zaštite sportista,
- f) javna preduzeća i javne ustanove koje pružaju usluge korištenja objekata na ime trenažnog procesa,
- g) sportska udruženja invalidnih lica,
- h) druga pravna lica koja obavljaju djelatnost iz područja tjelesnog odgoja i sporta.

**4. – Uslovi**

4.1. Nosioci sportskih aktivnosti mogu kandidirati **svoj program/projekat** ako ispunjavaju sljedeće uslove, i to:

- a) da imaju sjedište u Tuzlanskom kantonu,
- b) da su registrovani u skladu sa zakonom,
- c) da su izmirili svoje obaveze po osnovu poreza i obaveznih doprinosa ili imaju zaključen Sporazum o odgođenom plaćanju sa nadležnom poreskom upravom koji se izvršava na način utvrđen tim sporazumom.

4.2. Izuzetno, sredstva za sufinansiranje programa/projekata mogu se dodijeliti nosiocima sportskih aktivnosti sa sjedištem van područja Tuzlanskog kantona, koja su registrovana na teritoriji Bosne i Hercegovine, ako se radi o programima/projektima od interesa za Tuzlanski kanton, što će se cijeliti u svakom konkretnom slučaju.

4.3. Programi/projekti sportskih aktivnosti, kojima su dodijeljena sredstva sa potrošačke jedinice 24010003-Tjelesna kultura i sport u 2016. godini, a koje nisu podnijele narativni i finansijski izvještaj o namjenskom utrošku dodijeljenih sredstava biće odbačene i neće se uzeti u razmatranje, izuzev za dio sredstava koji nije doznačen iz Budžeta Tuzlanskog kantona, a koji će se dostaviti najkasnije 30 dana od dana prenosa sredstava na račun korisnika sredstava.

## 5. – Kriteriji

5.1. Vrednovanje, odnosno sufinansiranje kandidovanih programa/projekata vrši se u skladu sa odredbama ove tačke, i to na sljedeći način:

**a) vrhunski i kvalitetni sport** (vrednuju se i sufinansiraju takmičenja u okviru internacionalnih i državnih saveza članica IOC-a i Sport Accorda)

Sufinansiraju se programi/projekti koji se odnose na:

Vrhunski sport (kolektivni sportovi)

- pripreme i učešće na međunarodnom ligaškom takmičenju u organizaciji krovnih međunarodnih sportskih asocijacija, te olimpijskim ili paraolimpijskim igrama (juniorska ili seniorska konkurencija).

Vrhunski sport (pojedinačni sportovi)

- pripreme i učešće na olimpijskim igrama; svjetskim, evropskim i balkanskim prvenstvima; mediteranskim igrama; (juniorska ili seniorska konkurencija).

Kvalitetni sport (kolektivni sportovi)

- pripreme i učešće u prva dva najviša ranga takmičenja organizovanim na nivou BiH (seniorska konkurencija),

- pripreme i učešće u najvišem rangu takmičenja organizovanom na nivou BiH (omladinske uzrasne kategorije).

Kvalitetni sport (pojedinačni sportovi)

- pripreme i učešće na pojedinačnom prvenstvu BiH ili drugom sličnom prvenstvu koje osigurava plasman u reprezentaciju BiH.

Kandidovani programi/projekti vrednuju se kroz sljedeće kriterije:

- rezultati ostvareni u protekloj takmičarskoj sezoni (olimpijske igre; svjetsko, evropsko i balkansko prvenstvo; mediteranske igre; prvenstvo BiH; KUP BiH),

- složenost sistema takmičenja,

- dužina trajanja sezone,

- tradicija,

- masovnost.

**b) sport za lica sa invaliditetom**

Sufinansiraju se programi/projekti koji se odnose na:

Vrhunski sport (kolektivni sportovi)

- pripreme i učešće na međunarodnom ligaškom takmičenju u organizaciji krovnih međunarodnih sportskih asocijacija.

Vrhunski sport (pojedinačni sportovi)

- pripreme i učešće na paraolimpijskim igrama; specijalnim olimpijadama; svjetskim, evropskim i balkanskim prvenstvima.

Kvalitetni sport (kolektivni sportovi)

- pripreme i učešće u prva dva najviša ranga takmičenja organizovanim na nivou BiH.

Kvalitetni sport (pojedinačni sportovi)

- pripreme i učešće na pojedinačnom prvenstvu BiH ili drugom sličnom prvenstvu koje osigurava plasman u reprezentaciju BiH.

Kandidovani programi/projekti vrednuju se kroz sljedeće kriterije:

- rezultati ostvareni u protekloj takmičarskoj sezoni (paraolimpijske igre; specijalne olimpijade; svjetsko, evropsko i balkansko prvenstvo; mediteranske igre; prvenstvo BiH; KUP BiH),

- složenost sistema takmičenja,

- dužina trajanja sezone,

- tradicija,

- masovnost.

**c) tjelesne aktivnosti i sportske igre koje okupljaju veliki broj djece i omladine s ciljem pravilnog razvoja i unapređivanja zdravlja**

**1) školski sport**

Sufinansiraju se programi/projekti koji se odnose na:

- organizaciju školskih sportskih takmičenja.

Kandidovani programi/projekti vrednuju se kroz sljedeće kriterije:

- složenost sistema takmičenja,
- dužina trajanja takmičenja,
- rezultati ostvareni u proteklom periodu organizacijom istih ili sličnih takmičenja,
- tradicija organizovanja školskih sportskih takmičenja,
- stručni kadar za realizaciju programa/projekta.

**2) omasovljenje sporta i afirmacija uloge sporta u društvu, posebno kod mladih**

Sufinansiraju se programi/projekti koji se odnose na:

- tjelesne aktivnosti i sportske igre koje okupljaju veliki broj djece i omladine.

Kandidovani programi/projekti vrednuju se kroz sljedeće kriterije:

- uspostavljenost osnovnog segmenta po kategorijama (škola sporta-pioniri-kadeti-juniori),
- uspostavljenost sistema trenažnog procesa,
- broj učesnika u realizaciji programa/projekta.

**d) sportski odgoj i obrazovanje**

Sufinansiraju se programi/projekti koji se odnose na:

- sportsku edukaciju mladih, školske i studentske omladine,
- edukaciju stručnih lica.

Kandidovani programi/projekti vrednuju se kroz sljedeće kriterije:

- rezultati ostvareni u proteklom periodu realizacijom istih ili sličnih programa/projekata,
- stručni kadar za realizaciju programa/projekta,
- broj sati predviđen za edukaciju,
- broj učesnika u edukaciji.

**e) zdravstvena zaštita sportista**

Sufinansiraju se programi/projekti koji se odnose na:

- obezbjeđenje i unapređivanje sistema zdravstvene zaštite vrhunskih, kvalitetnih i perspektivnih sportista.

Kandidovani programi/projekti vrednuju se kroz sljedeće kriterije:

- broj pregleda/usluga u okviru kontinuiranog provođenja sistema zdravstvene zaštite u prethodnom periodu,

- broj sportista obuhvaćen sistemom zdravstvene zaštite,
- broj obavljenih sistematskih pregleda u prethodnom periodu.

**f) organizacija sportskih manifestacija**

Sufinansiraju se programi/projekti koji se odnose na:

- organizacija manifestacija sa dugom tradicijom i masovnog karaktera,
- organizacija sportskih manifestacija od kantonalnog značaja.

Kandidovani programi/projekti vrednuju se kroz sljedeće kriterije:

- tradicija organizovanja sportskih manifestacija,
- afirmacija sporta u Tuzlanskom kantonu,
- afirmacija sportskih rezultata koje su ostvarili sportisti sa područja Tuzlanskog kantona.

**g) pružanje usluga korištenja objekata na ime trenažnog procesa u oblasti sporta**

Sufinansiraju se programi/projekti javnih preduzeća i javnih ustanova koji se odnose na:

- pružanje usluga korištenja objekata na ime trenažnog procesa sportskim pravnim licima u kolektivnim sportovima, koji se takmiče u prva dva najviša ranga takmičenja na nivou BiH.

Kandidovani programi/projekti vrednuju se kroz sljedeće kriterije:

- rang takmičenja u kojem se takmiči sportsko pravno lice kojem se sufinansiraju troškovi trenažnog procesa,

- rezultati koje je sportsko pravno lice ostvarilo u protekloj takmičarskoj sezoni,

- složenost sistema takmičenja u kojem se takmiči sportsko pravno lice kojem se sufinansiraju troškovi trenažnog procesa.

5.2. Pod kolektivnim sportovima u smislu Javnog poziva smatraju se: fudbal/nogomet, košarka, rukomet i odbojka, a pod proteklom takmičarskom sezonom smatra se sezona 2015/16.

## **6. – Programi/projekti koji se ne sufinansiraju**

Pravo na dodjelu sredstava iz Javnog poziva ne mogu ostvariti nosioci sportskih aktivnosti koji su kandidovali programe/projekte čije sufinansiranje nije predviđeno tačkom 5. Javnog poziva, odnosno koji su kandidovali programe/projekte koji su usmjereni:

- a) na promociju programa političkih partija,
- b) za ostvarivanje vjerskih ciljeva,
- c) na finansiranje plaća i drugih izdataka zaposlenika u pravnom licu,
- d) isključivo na investiciona ulaganja, izgradnju i adaptaciju objekata, kupovinu opreme ili slično.

## **7. – Postupak**

7.1. Ministar formira komisiju koja, na osnovu propisanih kriterija, vrši vrednovanje, ocjenu i odabir programa/projekata kandidovanih od strane nosioca sportskih aktivnosti.

7.2. Program raspodjele sredstava za sufinansiranje i ostvarivanje javnog interesa Tuzlanskog kantona u oblasti sporta i tjelesne kulture za 2017. godinu (u daljem tekstu: Program), na prijedlog komisije iz tačke 7.1., donosi ministar.

7.3 Na osnovu donesenog Programa raspodjele sredstava, Ministarstvo će donijeti odluku o odobravanju finansijskih sredstava korisnicima iznosima i namjeni finansijskih sredstava, na koje saglasnost daje Vlada Kantona.

7.4. Međusobna prava i obaveze davaoca i korisnika sredstava, uređuju se posebnim ugovorom, koji nakon donošenja Programa i davanja saglasnosti Vlade Tuzlanskog kantona na odluku o odobravanju finansijskih sredstava korisnicima iznosima i namjeni finansijskih sredstava, u ime davaoca sredstava, zaključuje ministar.

7.5. Korisnik dodijeljenih sredstava dostavlja Ministarstvu narativni i finansijski Izvještaj o namjenskom utrošku sredstava na način i u rokovima koji će se definisati ugovorom iz tačke 7.4. Korisnik sredstava koji ne postupi u skladu sa ovom odredbom ne može ostvariti pravo za dodjelu sredstava za sufinansiranje programa/projekta za narednu godinu.

7.6. Prilikom kandidiranja programa/projekta aplikanti su obavezni ispuniti i dostaviti Aplikacijski obrazac za dodjelu sredstava sa potrošačke jedinice 24010003-Tjelesna kultura i sport za 2017. godinu, te obrazac Izjave o tačnosti svih podataka dostavljenih po prijavi na Javni poziv, ovjerene pečatom pravnog subjekta i potpisane od strane ovlaštenog lica.

7.7. Obrasci iz tačke 7.6. su sastavni dio Javnog poziva i mogu se preuzeti na web stranici Ministarstva ([www.monkstk.ba](http://www.monkstk.ba)).

## **8. – Prijavljivanje na Javni poziv**

Prilikom prijave na Javni poziv nosioci sportskih aktivnosti obavezni su dostaviti sljedeću dokumentaciju:

a) Aplikacijski obrazac za dodjelu sredstava sa potrošačke jedinice 24010003-Tjelesna kultura i sport za 2017. godinu - dostupan na web stranici Ministarstva – [www.monkstk.ba](http://www.monkstk.ba),

b) izjavu o tačnosti svih podataka dostavljenih po prijavi na Javni poziv – dostupna na web stranici Ministarstva - [www.monkstk.ba](http://www.monkstk.ba),

c) rješenje o upisu u registar pravnih lica (ovjerena kopija),

d) uvjerenje o poreznoj registraciji i ID broj (ovjerena kopija),

e) spesimen potpisa lica odgovornih za finansije (ovjerena kopija – ne dostavljaju nosioci sportskih aktivnosti iz tačke 3.2. d) Javnog poziva.

f) bilans stanja i bilans uspjeha za prethodnu godinu (ovjerena kopija),

g) dokaz o izmirenim obavezama po osnovu poreza i obaveznih doprinosa (uvjerenje izdato od nadležne poreske uprave) – ne dostavljaju nosioci sportskih aktivnosti iz tačke 3.2. d), 3.2. e) i 3.2. f) Javnog poziva,

h) fotokopije ugovora zaključenih između javnih preduzeća, odnosno javnih ustanova i sportskih pravnih lica u kolektivnim sportovima, koji se takmiče u prva dva najviša ranga takmičenja na nivou BiH, a koji se odnose na pružanje usluga korištenja objekata na ime trenažnog procesa – dostavljaju samo javna preduzeća i javne ustanove koji apliciraju sa programom/projektom pružanja usluga korištenja objekata na ime trenažnog procesa u oblasti sporta,

i) Prijedlog programa/projekta za sufinansiranje koji sadrži minimalno:

- opis programa/projekta,

- visinu troškova koja se potražuje,
- precizne podatke kojima se dokazuje ispunjavanje kriterija iz tačke 5. Javnog poziva,
- specifikaciju svih predviđenih troškova programa/projekta,
- podatke o drugim izvorima finansiranja sa tačno navedenim iznosima koje će ti izvori sufinansirati,
- kratak izvještaj o postignutim rezultatima u protekloj takmičarskoj sezoni – ne dostavljaju nosioci sportskih aktivnosti iz tačke 3.2. d), 3.2.e) i 3.2.f). Javnog poziva.

**Napomena:** Prilikom prijavljivanja prijedloga Programa/projekta za sufinansiranje nosioci sportskih aktivnosti mogu se služiti pripremljenim Modelom prijedloga programa/projekta koji se može preuzeti na web stranici Ministarstva ([www.monkstk.ba](http://www.monkstk.ba)).

#### **9. – Sporazum o odgođenom plaćanju zaključen sa nadležnom poreskom upravom**

Nosioci sportskih aktivnosti koji imaju zaključen Sporazum o odgođenom plaćanju sa nadležnom poreskom upravom dužni su prilikom kandidovanja programa/projekta dostaviti ovjerenu fotokopiju zaključenog Sporazuma o odgođenom plaćanju, te odgovarajuće dokaze o izvršavanju Sporazuma na način kako je to istim utvrđeno.

#### **10. – Rok za prijavu i način dostavljanja dokumentacije**

10.1. Javni poziv ostaje otvoren 15 (petnaest) dana od dana objavljivanja u dnevnom listu „Oslobođenje“.

10.2. Neblagovremene prijave bit će odbačene i neće se uzeti u razmatranje.

10.3. Prijave za sufinansiranje programa/projekata u oblasti sporta i tjelesne kulture u 2017. godini, sa potrebnom dokumentacijom, u zatvorenoj koverti, sa obaveznom naznakom „Javni poziv za sufinansiranje programa/projekata u oblasti sporta i tjelesne kulture – NE OTVARAJ“, dostaviti neposredno na protokol Ureda za zajedničke poslove kantonalnih organa ili slati preporučeno putem pošte na adresu:

**Ministarstvo obrazovanja, nauke,  
kulture i sporta Tuzlanskog kantona  
Rudarska 57, 75000 Tuzla**